

2012-imi ineqarneq pillugu naalakkersuinikkut ingerlatsinermut nassuiaat
(Ineqarnermut, Attaveqarnermut Angallanermullu Naalakkersuisoq)

Saqqummiussissut

Naalakkersuisut nuannaarutigeqalugu 2012-imi ineqarneq pillugu naalakkersuinikkut ingerlatsinermut nassuiaat Inatsisartuni oqaluuserisassanngorlugu saqqummiuppaat.

Kikkut tamarmik ullutsinnut naleqquttumik inissaqarnissaat aammalu siunissami ineqarnermut politikkitta ungasissumut sammisuunissaa, attanneqarsinnaasuunissaa aammalu suliaqartut attuumassuteqartut qanimut suleqatigalugit ingerlanneqarnissaa Naalakkersuisut pingaartittorujussuaat, ilanngullugit kommunit aamma aningaasaliisarnermut sullissiviit.

Naalakkersuisut politikkiat ersarilluinnarpoq: Piffissami qanittumi inissiaatitsinnik ullutsinnut naleqquttunngortitsisumik illoqarfinni nutarterisoqassaaq, tassani aaqqiissutissat nutaaliaasut siunissami sanaartornermut atortussat toqunartoqartarnerannik aamma oquup ajornartorsiutaasarneranik pinngitsoortitseqataassallutik aammalu ilaatigut oqoqalernermik kinguneqartumik inissiat aserfallakkiartornerannik unitsitsissallutik.

Siunissami sanaartornermi eqaatsumik atuisinnaanissap qulakkeerneqarnissaa aamma Naalakkersuisut pingaartittorujussuaat, taamaalilluni inissiat inuusuttunit, ilinniartunit, ilaqutariinnit utoqqarnillu atorneqarsinnaassallutik. Sanaartukkanik eqaatsumik atuisinnaanermi, inuiaqatigiinni pisariaqartitsineq allanngoraluartoq inissiat atorneqarsinnaanerat qulakkeerneqassaaq.

Aningaasanut inatsisissani suliassamut aningaasassanik pingaarnersiunissaq pisariaqartinneqartussaavoq. Suliassap naammassineqarnissaanut aningaasalersueriaatsimik eqqortumik nassaarnissaq Naalakkersuisut aalajangiusimalluinnarpaat. Taamaattumik ineqarnermut suliassaarfik aamma Akiitsunut aamma aningaasaliisarnermut periusissami qitiulluinnartumik ilaavoq, taannalu aamma 2012-imi Inatsisartut upernaakkut ataatsimiinneranni saqqummiunneqartussaavoq.

Periusissaq manna iliuusissanut pilersaarummik imaqarpoq, aningaasaqarnikkut illersorneqarsinnaasimappat nalillit inuiaqatigiit pilersitaasa Namminersorlutik Oqartussat inissiaataattut ittut pigiinnarneqarnissaannut qulakkeerisussaaq. Inissiat siunissami pitsaasuuginnartinniassagutsigu inissiani iluarsaanneqarsimasuni nutaanilu aserfallatsaaliuinnissamut, ineqarnermut akiliutit aqutigalugit naammattumik aningaasanik immikkoortitsinissaq pisariaqartoq allaqqussinnaanngilarput. Tamatumani inissiat ukiut 20-it aamma 30-it qaangiuppata aamma pitsaasuunissaat qulakkeerneqassaaq.

Pissusiviusunut nalunaarusiaq inissiat amerlassusaat, taakkua pitsaassusaat, innuttaasut amerlassusaat aamma illoqarfinni nunaqarfinnilu tamaginni inoqutigiit agguaqatigiissillugu

isertitaat pillugit paasissutissanik imaqartoq Naalakkersuisut siusinnerusukku agguappaat. Tassani takutinneqarpoq inissiat arlalippassuit isateneqartariaqartut, allat atuuffissaat sivitsorsarneqarsinnaavoq, allat iluarsanneqarsinnaapput aammalu inissiat ikittuaraannaat pitsaasuupput taamaallaat aserfallatsaaliorneqartariaqarlutik.

Misissuinerit takutippaat Namminersorlutik Oqartussat inissiaataanni attartortut amerlasoorsuit namminneq inissaminnik pisinissamut akissaqartut. Namminersorlutik Oqartussat inissiaataanni ineqarnermut akiliut piviusorsiornerusumik illersorneqarsinnaasumillu annertussuseqalerpat, missingersuutini aserfallatsaaliuinissamut akissaqartitsilerluni, inoqutigiit aningaasaqarnikkut nukittuujujut namminneq inissaminnik pisinissamut kajumissuseqarnerulissapput.

Taamaattorli Naalakkersuisut aamma eqqumaffigisorujussuat akissaatikinnerusut ineqarnermut akiliummut qaffasinnerusumut taarsiivigineqartariaqartut. Taamaattumik Naalakkersuisut ineqarnermut, akileraartarnermut aamma isumaginninnermut politikkip ataqatigiissinnissaat sulissutiginiarpaat.

Neriuppunga Inatsisartut nassuiaat tigulluarumaaraat, aammalu oqallinnissamut, taamaalillunilu siunissami sulinissamut tunngaviliisinnaassasoq.

Taamatut oqaaseqarlunga suliaq Inatsisartuni suliassanngorlugu tunniuppara.